

ERINDISBRÉF

fyrir löggilta vigtarmenn.

1. gr.

Löggiltum vigtarmanni ber að stunda starf sitt af samviskusemi og alúð og að gæta fyllstu óhlutdrægni. Vottorð löggilts vigtarmanns er full sönnun um þyngd þess sem vegið er og hvað er vegið. Starf löggilts vigtarmanns leggur honum því mikla ábyrgð á herðar.

2. gr.

Löggiltur vigtarmaður með almenna löggildingu getur stundað störf sín hvar sem er á landinu, en hann má einungis starfa hjá atvinnurekendum sem ekki eru aðilar að viðskiptum með þá vöru sem hann vegur svo sem hjá hafnarsjóðum sem veita almenna vigtarþjónustu. Vinni vigtarmaður sem starfsmaður kaupanda eða seljanda vöru er hann vegur skal hann sækja um takmarkaða löggildingu og gildir hún einungis fyrir störf á vinnustað hans. Heimilt er að binda ákveðin vigtarstörf við takmarkaða löggildingu. Löggiltur vigtarmaður skal upplýsa Löggildingarstofuna um breytingar sem verða á störfum hans þ.e. ef slíkar breytingar kalla á breytta löggildingu skv. þessari grein.

3. gr.

Löggiltur vigtarmaður skal sjálfur vera við þá vigtun sem hann vottar og undir engum kringumstæðum má hann fela vigtunina öðrum í sínu umboði. Hann skal með eigin hendi skrifa undir vigtarseðla eða vottorð um niðurstöður vigtunar sinnar er hann gefur út og stimpla með áletruninni „Löggiltur vigtarmaður“.

4. gr.

Löggiltur vigtarmaður sem vegur afla fiskiskipa skal sérstaklega gæta að ákvæðum laga um stjórn fiskveiða og reglugerða um vigtun sjávarafla og sjávarafurða settum með stoð í þeim lögum.

5. gr.

Brjótí löggiltur vigtarmaður gegn starfsskyldum sínum skv. erindisbréfi þessu, getur það valdið tafarlausri sviptingu löggildingar. Löggildingarstofan tekur ákvörðun um slíka sviptingu að fengnum áreiðanlegum gögnum um brotið. Hægt er að kæra slíka ákvörðun til ráðuneytisins eða höfða mál til ógildingar hennar. Svipta má vigtarmann löggildingu með dómi í opinberu máli.

6. gr.

Skylt er löggiltum vigtarmanni að sækja námskeið sem krafist er af ráðherra í því skyni að tryggja símenntun vigtarmanna í starfsgrein sinni. Setja má skilyrði um þátttöku í slíkum námskeiðum við endurnýjun löggildingar.

7. gr.

Löggilding vigtarmanns gildir í allt að fimm ár, en heimilt er að ákveða styttri gildistíma löggildingar í einstökum tilvikum skv. ákvörðun ráðherra. Skylt er vigtarmanni að sætta sig við breytingar sem gerðar kunna að vera á erindisbréfi þessu.

8. gr.

Löggildingar vigtarmanna, sem útgefnar hafa verið fyrir 1. janúar 1993 eru almennar löggildingar og gilda þær þar til að endurnýjun löggildingar kemur, en þær falla úr gildi í síðasta lagi 1. janúar 1998. Skal þá metið hvort veita skal vigtarmanni almenna eða takmarkaða löggildinguna við endurnýjun leyfisbréfs.

Erindisbréf þetta fyrir löggilta vigtarmenn er sett með heimild í 19. gr. laga nr. 100/1992 og gildir frá 1. apríl 1993.

Viðskiptaráðuneytið, 31. mars 1993.

Jón Sigurðsson.

Björn Friðfinnsson.

1. apríl 1993

Nr. 148

GJALDSKRÁ

fyrir vopnaleit á Keflavíkurflugvelli.

1. gr.

Greiða skal sérstakt gjald, vopnaleitargjald, fyrir hvern mann sem ferðast með loftfari frá Íslandi til annarra landa um Keflavíkurflugvöll.

Undanþegnir gjaldskyldu eru börn innan tveggja ára, skráðar áhafnir loftfara, þeir sem viðkomu hafa á Íslandi samkvæmt farseðli milli annarra landa og Norður-Ameríku og þeir sem ferðast með loftförum varnarliðs Bandaríkja Norður-Ameríku hér á landi.

2. gr.

Vopnaleitargjald er kr. 60,00 fyrir hvern farþega. Fyrir farþega á aldrinum tveggja til tólf ára skal greiða hálf gjald.

3. gr.

Eigandi loftfars eða sá sem ábyrgð ber á rekstri þess er ábyrgur fyrir greiðslu vopnaleitargjalds.

Við brottför loftfars frá Keflavíkurflugvelli skal afhenda sýslumanninum á Keflavíkurflugvelli eða eftir atvikum umboðsmanni hans í flugstöð skrá sem hefur að geyma upplýsingar um fjölda farþega með loftfarinu, áhöfn þess og hverjir séu gjaldfrjálsir skv. 2. mgr. 1. gr. eða greiða hálf gjald skv. 2. gr. Sýslumanni er heimilt að semja svo við rekstraraðila loftfars að umrædd skrá sé afhent um leið og vopnaleitargjaldið er greitt, sbr. 4. gr. hér á eftir.

4. gr.

Vopnaleitargjald vegna farþega er ferðast með loftförum sem skráð eru erlendis og allra loftfara sem ekki er flogið á áætlunarleiðum, skal greiða sýslumanninum á Keflavíkurflugvelli fyrir brottför loftfars um leið og afhent er skrá samkvæmt 2. mgr. 3. gr. Sýslumanni er þó heimilt að veita greiðslufrest til 15. dags næsta almanaksmánaðar eftir brottför.

Vopnaleitargjald vegna farþega sem ferðast í áætlunarflugi á viðurkenndum áætlunarleiðum, skal greiða til sýslumannsins á Keflavíkurflugvelli eigi síðar en 15. dag næsta almanaksmánaðar eftir brottför. Sé vopnaleitargjaldi ekki skilað á réttum gjalddaga ber það dráttarvexti skv. III. kafla vaxtalaga nr. 25/1987 frá gjalddaga til greiðsludags. Nú er skrifstofa sýslumannsins á Keflavíkurflugvelli lokuð 15. dag mánaðar og telst þá gjalddagi vera næsti dagur þar á eftir sem skrifstofan er opin til almennrar afgreiðslu.